

Kolosai zengât ekap Paulonâ kulemgum zingip.

Mâsop sot sâiwap den.

1 ¹⁻²Bukurâpniknâ, Kembugât singi a Kolosai kamânân Kristo sot pâlâtân upme, zengât ekap zi kulemgum zinget. Paulo nâ Anutugât sâtkât op Yesu Kristogât op Aposolo orâwan. Nâ sot Timoteo, net zengât ekap zi kulemgum zinget. Anutu Ibâniñangâren gâbâ tânzângoziñgoñ sot um lumbe zengâren zem zimbap.

Kolosai zengât op sâiwap sâmarâwet.

³Ninâu sâmet dâp net Kembuniñâ Yesu Kristo, zâkkât Ibânâ Anutu, zâkkâren zengât op sâiwap sâm ninâu sâmet. ⁴Zen Yesu Kristo nângâm pâlâtân kwâkñangâwe sot Kembugât singi a kamân nâmbutñan gâbâ gane buku otzingâme, zorat sâiwap sâmet. ⁵Sumbemân ândiândi kâtik zengât singi pâipkât zo minam um bâbâlan op mambât ândime. ⁶Anutugât tânzângoziñgoñangât den, den bonñâ, zo zengâren gâi nângâne zengâren bonñoot oip. Zo yatik singi âlip zo hân dâp muyagem lan kârâm âim bon opmap.

⁷Bukuniñâ âlipñâ Epapara, Kristogât kore a op ândim den sâmap. Zo yatik opmap, zâknâ singi âlip dâzângozi nângâwe. ⁸Oi Kaapumñâ umziñ kubigi umziñâ gâsâyagom ândie. Epapara zâk zorat siñgiñâ dâtnâkoip. Zâk zengât op nep tuumap.

Kolosai zengât op ninâu sâwet.

⁹Oi net zengât den singi zo nângâm zobik topkwap zengât op ninâu sâm gamet. Anutuñâ sâi Kaapumñâ den topñâ sot nângânangâ zingip Anutugât den nângâm kwâtâtibigât ninâu sâmet. ¹⁰Kembuniñâ yatâ otzingip Kembugât a târârak ândine zingiri dâp upap. Oi âlipñangât nep top top, zo tuum bonñâ muyagibi. Oi Anutugât topñâ nângâm birañbi. ¹¹Anutu zâk imbanñâ mariñâ. Zâk imbanñâ âsakñoot zorân kâtikñan kwatzingi kâtigem ândine kwâkziñan kut nâi nâi yâmbât zari mân lorem kin

um bâbâlanjâk op sâiwap sâm dukubi. ¹²Oi Ibânij u âsakņan ândiap, zâkņâ ândiândi kâtikkât siņgi kwatņiņgip. Zo Kembugât siņgi a nengât siņgi upapkât sâi ziap. Zen zorat nâņgâm um bâbâlanjâk op sâiwap sâm dukubigât ninâu sâmet. ¹³Anutu zâk ŋâtâtik mariņanggât bikņan gâbâ mâkâniņgâm nanņanggât kiņ topņan nâambarip. ¹⁴Nanņâ zâk tosanijanggât sâņgânņâ pam bâliņan gâbâ mâkâniņgip.

¹⁵Anutu Ibâ, zâk mân igikņâ. Ka nanņâ Anutugât holiņâ sot topņâ muyageip. Mârum hân kwâkņan kut ŋâi ŋâi mân muyagei nanņâ kâdom muyageipkât kâukņiņ ândieņņak ândiap. ¹⁶Anutuņâ sâi nanņandâ a top topņâ sot kut ŋâi ŋâi sumbemân sot hânân zo muyageniņgip. Igikņâ sot mân igikņâ. Sumbem a âlipņâ imbaņâziņoot sot Sataņ sot sumbem arâņņâ bâliņâ imbaņâziņoot. A kutâ sot zâizâiņ zo aksik patâ nanņanggât imbaņandâ muyageziņgip. Oi zo zâkkât siņgi muyageziņgip. ¹⁷Mârumņan a sot kut ŋâi ŋâi mân muyagei zei nanņâ kâdom muyageip. Oi zâk zobâ ândim gâip. Nanņâ zâk a sot kut ŋâi ŋâi zorat galem a sâtņâ op ândiap. A sot kut ŋâi ŋâi zo zâkkât bikņan zem gâmap. ¹⁸Kiņ bitniņanggât kâukņâ ândiap, zo yatik Yesugât kâmut ândien, nen Yesugât kiņ bikņâ ândeindâ zâk kâukņiņâ ândiap. Zâk ândiândi niņgi zâkkât kâmurân ândien. Nanņâ zâk mârumņan gâbâ kâdom op mumuņan gâbâ zaarip. Zâk a sot kut ŋâi ŋâi aksik zorat kâukņâ upapkât mumuņan gâbâ kâdom otniņgâm zaarip.

Yesuņâ nen Anutu sot buku utnatkât diiniņgip.

¹⁹Anutuņâ zikņâ imbaņâ sot ândiândiņâ sot holiņâ nanņanggâren dâbâk zimbapkât nâņgi dâp oip. ²⁰Oi a sot kut ŋâi ŋâi hânân sot sumbemân Anutu kâsa okņanggâm ândiwen, nen Anutu sot buku utnatkât nanņâ sâm pindi poru nagân moi gilâmņandâ lumbenâ muyageniņgip.

²¹Kolosai a ambân zen mârum Anutu kâsa okņanggâm ândiwe. Zen Anutu kândâtkum ândiwe. Nâņgânâņgâziņ bâliņ oi laņ gulip ândim bâliņâ top top op ândiwe. ²²Ka Kristoņâ um salek kwatziņgi Anutu sot buku op zâkkât mâteņan hâlâlû sot tosa buņ ândibigât a yatâ opņâ poru nagân moip. ²³Zorat zen Yesugâren nâņgâm pâlâtâņ kwâkņanggâm kâtigem kinbi. Den siņgi âlip muyagem ziņgip, zo gulip opapkât mân loribi. Siņgi âlip zorat bonņâ minam um bâbâlanjâk op mambât ândibi. Zen yatâ utnetâ Yesuņâ diiziņgi Anutugât mâteņan aņun buņ kinbi.

Siņgi âlip a hân dâp zengâren laņ kârâm ariap.

Siņgi âlip zo zen Epararaņâ dâzâņgoip. Oi zenâk buņâ. Siņgi âlip zo a kamân dâp dâzâņgom arindâ nâņgâwe. Paulo nâ nep zorat kore a orâwan. Oi nâ Kolosai zengât op sâknam kwâkņan ândiman.

²⁴Kristoņâ a kâmutņâ nengât kâukņiņ ândiap. Oi nen ombenjan kiņ bikņâ yatâ ândien. Oi Kristo zâk kâmut patâ nengât op sâknam nâņgip. Sâknam torenņâ ŋâi nâņgânâņgâņ ziap, zo kwâkņan zâibapkât sâip. Zorat

nâ umâlip op zengât op sâknam kwâkņan ândiman. ²⁵Anutuņâ nep sâm nigî zâkkât kâmut zengâren kore op ândiwan. Kore otzingâm ândibat sot a hân ŋâin gokņâ singî âlip dâzâņgom nanğâbatkât sâm nigip. ²⁶Singî âlip den zo narâkņâ narâkņâ ekapņoot zei mân nanğâm ândim gawe. Ka narâk ziren Anutu zikņak zâkkât singî a nen sâm muyageningip. ²⁷Oi den mârur tik zeip, zo a hânņâ hânņâ muyageziņğâbapkât Anutuņâ nanğî âlip oip. Den zo bonņoot sot âsakņoot. Oi den zorat topņâ itâ. Kristogât Kaapumņâ umziņan ândiapkât sumbemân zâim neule âsakņoot ândibigât mambât ândie. ²⁸Nen a ambân Kristogât topņâ sâm muyageziņğâmen. Oi girem den dâzâņgomen. A pisuk patâ zen Kristo sot pâlâtâņ op mem kâtigem nanğânâņğâziņ yâmbârem gwâlanteņsâbapkât yatâ upmen. ²⁹Zen Kristo sot pâlâtâņ op kâtigem upigât Kristoņâ imbaņâ nigî kâtigem sâknam nep tuuman.

2 ¹Kolosai zengât op kâtigem sâknam nep tuuman, zorat dâzâņgua nanğânek. Kristogât kâmut Kolosai kamânân ândie sot Laodikea kâmânân ândie, zengât op ninâu nebân kâtigem tuuman. A nigâwe sot a mân nigâwe ârandâņ. Zengât op nebân sâknam patâ nanğâman. ²Zen Anutuğât den tikņâ zeip, zorat topņâ nanğâm kwâtâtibigât nep tuuman. Zen nanğâm kwâtâtem umziņandâ gâsâyagoi um bâbâlaņ op kengât buņ ândibi. ³Yesu Kristogâren den nanğânâņğâ sot top nanğânâņğâņ mamņâ ziap. Oi zâk nanğânâņğâ niņgi den bonņangât topņâ nanğâmen. ⁴A nâmbutņâ ziņ um gulip kwatziņğâbegât yatâ san.

⁵Nâ zengât nanğâm ândiman. Nâ sâknandâ zen sot mân ândiman. Kârebân ândiman zo ko umnandâ ko zen sot ândiandâ Kristo nanğâm pâlâtâņ kwâkņanğâm târoyagom ândine ziņgitņâ umnâ âlip uap. ⁶Zen Kristo sot pâlâtâņ urâwe, zo yatik zâk sot pâlâtâņ op ândibi. ⁷Den bonņâ mem ândim zâkkâren pâlâtâņ op kinbi. Zen yatâ opņâ topņâ nanğâm kwâtâtibi. Mâtâp tirâpziņğowe, zo lâņ kâtigem sâiwap sâm ândine zâkkâren zâibap.

Kristo sot pâlâtâņ op ândim umgât gom sambe mân kârumat.

⁸A ziņâ zo zengât arâpziņâ upigât den kelâkņoot dâzâņgom um gulip kwatziņğâbegât umziņ galem oraņğâm ândibi. Den zo ayân gâbâ nanğânâņğâ den, sarâ, yenņâ. Den zo sâkurâpziņangât den pat yatâ. Den yatâ zo Kristogâren gâbâ mân muyageip.

⁹Kristogât sâkņan Anutuğât holiņâ sot ândiândiņ sot imbaņâ piksâm zei ândimap. ¹⁰Kristo zâk a kutâ zâizâiņ sot kembu patâ otningâm ândiap. Sumbem a âlipņâ sot bâliņâ sot wâke top topņâ imbaņâziņoot, zen ombenjan ândie. Oi zâkkât singî a nen zâk sot pâlâtâņ oindâ ândiândi neņğâren piksâm sambâlem ziap, zorat zen umgât kut ŋâi ŋâi zorat mân kârume. ¹¹Zen Kristo sot pâlâtâņ utne umziņan bâliņâ zeip, zo sanğorip. Zen sâgân kwabâyagowe, zorat buņâ. Zen ândiândi sâņgiņâ sâmbum pam

Kristogâren pâlâtâŋ urâwe. ¹²Tooyân saŋgonziŋgâwe, zorâŋâ Yesugât mumuŋan târokwatziŋgip. Oi Anutu zâk imbaŋaŋgât Kristo mumuŋan gâbâ mângeip. Imbaŋâ zo yatik nânġâm pâlâtâŋ kwapme, zeŋgâren zari Yesugât zaatzaatŋan târokwatziŋgip.

¹³Zen mârum bâliŋâ op um mumuŋâ ândine Anutuŋâ tosaziŋ birâmŋâ Kristo sot mânġiziŋġi ândie. ¹⁴Oi tosaziŋaŋgât den ekabân zeip, zo moloŋâ poru nagân mândi buŋ oip. ¹⁵Yatâ opŋâ Sataŋ sot wâke zâizâiŋ sot imbaŋâziŋoot timbâ kâmbamziŋ mem kom sâmbum a ambân mâteziŋan topziŋ sâm muyageip. Zâk poru nagân yatâ oip.

A ziŋ um gulip kwatniŋġâbegât gasâniŋ kârâm ândinat.

¹⁶A ziŋ nalem nâmbutŋâ birâm ândibigât mo Yuda zeŋgât kendon patâ mo mâik tâtatŋaŋgât, zorat den sâkziŋan sâne mân nânġâbi. ¹⁷Wangât, kendon zo bonŋâ buŋâ. Bonŋâ bet muyagibap. Zorat bet muyagibap, zorat dâp zorâŋ kândom gâip. Bonŋâ ko Kristogâren ziap. Oi zen zâk sot pâlâtâŋ upme. ¹⁸A nâmbutŋandâ sâkkât âkŋâle bâliŋâ pâke kwâtnam sâkkât kendon ândim sumbem a mâpâsibigât sâme. A yatâ zo, ziŋ kut ŋâi ŋâi uman ekŋâ zorat nânġâne bon opmap. A yatâ zo, zen sâkziŋ laŋ mem zâi pam den bon buŋ, zo dâzâŋgom ândime. Nânġânânġâziŋâ zo ko ayân gâbâ âsageip. A zo, zen Kristo sot pâlâtâŋ mân upme. ¹⁹Kristo zâk kâukniŋâ. Nen kiŋ bikŋâ yatâ. Oi kâukŋan gâbâ sânamŋandâ pâuksâm gem bonŋâ mem kâtikŋan kwap saaniŋġamap. Oi Kristo zâk um dâpkât nalem niŋġâm tânnânġoi lâmbatnatkât imbaŋâ zemŋânġap. Anutu zâk yatâ nânġâm kubigi ziap.

Kâsâp den a umân muygeip, zo mân nânġânat.

²⁰Zen Kristo mumuŋan târokwapŋâ hângât den kândâtkuwe. Oi ândiândi sâŋgiŋâ kândâtkomŋâ dabân hângât a yenŋâ yatâ ândim agât den lume? ²¹A ziŋ den itâ sâne lume, “Zi mân gâsuban. Zi mân nimban. Zi mân mimban.” ²²Kut ŋâi ŋâi zo buŋ opmap, zo mân tâmbetgobap. Zorat opŋâ wangât mân nimbi, mân mimbi sâme? Den yatâ zo Anutugât den buŋâ. Den zo a ziŋ umziŋan nânġâm sâm kwâkâyaŋġâme. Zorat a ziŋ den yatâ zo sâne mân nânġâbi. ²³A yatâ zorâŋ den nânġânânġâ tobat upme. Ka den sâme, zo bonŋâ buŋâ. Zo top nânġânânġânġânġât den buŋâ. Zen sâkkât âkŋâle zorat pâke kwâtnam sâkkât kendon ândime. Sâkziŋ mem geinam sâne den zorâŋ den bonŋâ yatâ opmap. Ka yatâ zorâŋ bon buŋâ. Zorâŋâ sâkkât âkŋâle pâke mân kwâpap.

Sumbemân zâim ândiândiŋ, zorat nânġânat.

3 ¹Kristo zâk mumuŋan gâbâ zaatŋâ sumbemân zâi ândiap. Oi zen Kristo zaatzaatŋan târokwarâwe. Zorat urâ Anutugât âsanŋâ bongen Kristoŋâ den nânġâm ândiap, zorarâk nânġâm ândibi. ²Hânân den

sâm âragume, zorat buŋâ. Sumbemân den âlipŋâ nâŋgâm ândie, zorat nâŋgâm ândibi. ³Zen Kristo mumuŋan târokwarâwegât a mumuŋa yatâ hân a zengât den bâliŋâ zo mân nâŋgâm ândibi. Wangât, ândiândizij zo Kristo sot Anutugâren tik ziap, zorat. ⁴Oi Kristo zâk ândiândij mâriŋandâ taki zen yatigâk zâk sot ârândâŋ âsakŋâ neuleŋan muyagem ândibi. Zen zorat op nâŋgâm ândibigât san.

Um sâŋgiŋâ lândim pânat.

⁵Zen sâkkât âkŋâle bâliŋâ zorat kendon ândim kut ŋâi ŋâi itâ zo birâbi. Laŋ mâman, kut ŋâi ŋâi mân orotŋâ sot sâkkât âkŋâle bâliŋâ. A ŋâigât kut ŋâi ŋâi zorat âkŋâle mân upi. (A ŋâigât kut ŋâi ŋâiŋangât âkŋâle orot, zo Anutu kândâtikum umziŋ ŋâigâren pâpanŋâ yatâ.) ⁶Um kâtik a ziŋ bâliŋâ zo aksik upmegât Anutuŋâ hâuŋâ ziŋgâbap. Oi Kristogât kâmut Kolosai kamânân ândie, zen mârum kut ŋâi bâliŋâ top top zo op ândiwe.

⁷⁻⁸Narâk zi ko kut ŋâi ŋâi bâliŋâ zi aksik birâbi. Kuk sot den sârek, um kâlak, mem ge kwâkwat den sot den bâliŋâ. ⁹Sarâ mân sâbi. Um sâŋgiŋâ sot orot mâme gâŋgoŋâ zo lândim pegât zo aksik birâbi. ¹⁰Oi um uŋakŋâ zo Anutugâren gâbâ mem ândibi. Um uŋak Anutuŋâ muyageip, zo kubigi nâŋgânâŋgâ sot opŋâ zikŋâ holi yatâ muyagem ândiap. Zen Anutugât topŋâ nâŋgâm kwâtâtem ândibigât yatâ oip. ¹¹Zorat kâsâp ândiândij zo âkip. Yuda a sot Grik a, kwabâ kwarangâwe sot mân kwabâ kwarangâwe, saru a mo barâ a, kore a sot a patâ zo aksik patâ Kristoŋâ mâpotniŋgâmŋâ kâukniŋâ ândiap. Oi nen aksik zâkkât ombenjan dâp kânok ândien.

Nen Kristo sot pâlâtâŋ urâwengât siŋgi âlip lum ândinat.

¹²Anutuŋâ umŋandâ gâsuziŋgâm buku otziŋgâm gâsum sâlâpziŋgoip. Zorat zen itâ upi. Um lâklâk op buku upi. Zen umziŋ gigiŋâ oi um sânduk ândibi. Siŋgi âlip lum ândim âkon mân upi. ¹³A ziŋ bâliŋ otziŋgâne zorat hâuŋâ mân otziŋgâbi. Osetziŋan tosa ŋâi muyagei birâm kândâtikum ândibi. Kembuŋâ tosaziŋ birip. Zen yatik bukurâpziŋangât tosaziŋ birâbi. ¹⁴Oi kut ŋâi ŋâi zo opŋâ walâm umziŋandâ gâsâyagom ândiândij, zo mem kâtigem ândine zorâŋâ mâpotziŋgi um kânok upi. ¹⁵Oi Kristo sot pâlâtâŋ op ândine zâkkâren gâbâ um lumbe zorâŋâ umziŋan nep tuubap. Zen lumbe opŋâ um kânok op ândibigât Anutuŋâ diiziŋgip. Oi zâkkâren sâiwap sâm ândibigât nâŋgip. ¹⁶Kristogât den osetziŋan laŋ kârâbapkât kâtigibi. Oi nâŋgânâŋgâ den top topŋâ kwâkâyangâm galem orangâm ândibi. Yatâ utnetâ Kaapumŋâ mem bâbâlaŋ kwatziŋgi mâtâpâse kep sâŋgiŋâ sot siŋgi âlipkât kep mimbi. Umziŋandâ Anutugâren sâiwap sâm, sâm âlip kwâkŋangâm mimbi. ¹⁷Zen Kristogât kâmut gakârâpŋâ ândie, zorat nâŋgâm den mo nep utnam dâŋâk upi. Zen zo yatâ utne âlip oi Kembu Yesugât kutsiŋgiŋâ laŋ kârâbap. Zen yatâ op ândibigât Kristoŋâ imbaŋâ ziŋgâbap. Zorat Anutu Ibâniŋ sâiwap sâm dukubi.

¹⁸Zen Yesu Kristo sot pâlâtâŋ urâweŋâ ândiegât itâ op ândibi. Ambân zen abarâpziŋangât ombeziŋan ândim sâtziŋ lum ândibi. ¹⁹A zen âmbirâpziŋ buku otziŋgâm ândibi. Ambirâpziŋ kârâpŋoot mân otziŋgâbi.

²⁰Katep zen ibâ mamârâpziŋ den ŋâi mo ŋâigât sânetâ lubi. Zen yatâ utnetâ Kembuziŋandâ nâŋgi âlip upap. ²¹Ibâ mam zen nan bârarâpziŋ ziŋgit um kâlak upegât kubikziŋgânam kut ŋâi kârâpŋoot walâwalân mân otziŋgâbi.

²²Kore a sot nep a, zen patârâpziŋ zengât sâtziŋ lubi. Zo a ziŋ ziŋgitne âlip upapkât buŋâ. Kembu hurat kwâkŋangâm utne dâp upap. ²³Nep aksik zo a patâ zengârâk opŋâ buŋâ. Kembugât op bâbâlaŋâk tuubi. ²⁴Zen itâ nâŋgâbi. Zen hânân Kembu Kristo zâkkât kore a op ândie. Oi nepkât sâŋgânŋâ sumbemân ziap, zo Kembugâren gâbâ mimbi. ²⁵Ka ŋâi zâk bâliŋangât nep tuugi zo yatik hâuŋâ yâmbâtŋâ mimbap. Kembuŋâ kore a sot a patâ dâbâk otziŋgâmap. Zâk hâtubâtu mân otningâmap.

4 ¹A patâ zengât den sa nâŋgânek. Patâziŋâ Kembu zâk sumbemân ândiap, zorat zen zâkkât nâŋgâm kore a gakârâpziŋ kut ŋâi ŋâi târâragâk dâpziŋan galem otziŋgâbi.

Ninâu sâsâŋangât den.

²Kolosai a, zen âsâbân ninâu sâm ândibi. Oi um wâgân ândim sâiwap sâm ninâu sâm ândibi. ³Oi nengât op ninâu sâne Anutuŋâ siŋgi âlip sânatkât mâtâp muyageniŋgi Kristogât den mârum tik zeip, zo sâm muyaginat. Nâ den zo dâzâŋgom ândiwangât um kâtik, ziŋ kâsa otnim gâsânom tâk namin nâbane ândian. ⁴Zorat Kolosai a zen nâgât op ninâu sâbi. Ninâuŋâ betnan mine bâbâlaŋ op Kembugât den zo sâm muyagia dâp upap.

⁵Kolosai a, zen um kâtik a, kândâtŋan gok, zen sot kândiangâm gulip ândiândiŋ mân op kut ŋâi ŋâi nâŋgâmŋik upi. Kembugât den dâzâŋgonam ândibi. ⁶Dinziŋâ kubikne sii semen yatâ naam oi dâzâŋgobi. Zen yatâ opŋâ a den melâŋ dâzâŋgonam mân kwakpi.

Tikiko sot Onesimo

⁷Nâgât den siŋgi zo Tikikoŋâ otziŋgâbap. Zâk Kembugât nebân bukunâ oi umnandâ gâsumap. Berân mâmeniŋâ sot Kembugât kore a sât luluŋoot. ⁸Zâk zengâren gam den siŋgi otziŋgâbapkât sâŋgongua gaap. Um bâbâlaŋ kwatziŋgâbapkât op zengâren gaap. ⁹Oi bukuniŋâ Onesimo, Kembugât sât luluŋ a zengâren gokŋâ, zâk ârândân sâŋgongua gamŋâ kut ŋâi ŋâi ziren âsagiap, zorat den siŋgi dâzâŋgom nanŋâbobot.

¹⁰Bukunâ Aristako nâ sot tâk namin ândiap, zâk sot Banabagât nepânŋâ Mareko sot Yusito, kutŋâ ŋâi Yosua, ziŋâ nâŋgâziŋge. (Marekogât den mârumŋan dâzâŋgowan. Zâk zengâren gâi buku okŋangâbi.) ¹¹Aristako, Mareko sot Yusito, a karâmbut zo, ziŋâ Yuda a zengâren gâbâ muyagiwe.

Ziŋâ Anutu um topŋan ândiândiŋâ muyagibapkât nep betnan mime. Yuda a nâmbutŋâ Yesu sot pâlâtâŋ urâwe, zeŋgâren gâbâ ŋâi mân betnan mime.

¹²Oi Kolosai zeŋgât kamânân gokŋâ a ŋâi, Epapara, Kristogât kore a, zâkkât nâŋgânâŋgâŋ Kolosai a zeŋgâren ziap. Oi zen Yesu Kristo sot pâlâtâŋ op Anutugât diŋaŋgât topŋâ nâŋgâm kwâtâtem lum ândibigât âsâbâŋ ninâu sâm kâtigemap. ¹³Zâkkât topŋâ nâŋgâmangât itâ dâzâŋgobâ. Zâkŋâ zeŋgât opŋâ sot Laodikea kamânân gok sot Hierapoli kamânân gokŋâ Kembangât siŋgi a ambân kâmut ândie, zeŋgât op ninâu nep, sâknam nep patâ tuumap.

¹⁴Dema sot mâsek kubikkubik a bukuniŋâ Luka, zet nâŋgâziŋgabat.

¹⁵Oi Laodikea kamânân bukuniŋâ a kâmut sot Nimbasi sot kâmut zâkkât mirin mindume, zeŋgât nâŋgâm sâtâre opman. Den zo sapsun ziŋgâbi.

¹⁶Ekap zi a ambân sâlâpkum nâŋgâm naŋgâne ko Laodikea kamânân kâmut ândie, zeŋgâren pane ari sâlâpkubi. Oi Laodikea zeŋgât ekap ŋâi kulemguan, zo yatik zen ziŋgâne sâlâpkubi.

¹⁷Arikipo, zâk itâ dukubi, “Nep Kembuŋâ gigip, zo mulunâk tuum biraŋban.”

¹⁸Den nâmbutŋâ zo yen sa bukunâ ŋâiŋâ kulemguaŋ. Ka zi ko Paulo nâ ninâ bitnandâ simbup mem kelikmelik den zi kulemgum paan. Nâ tâk namin ândian, zorat nâgât op ninâu sâbi. Anutugâren gâbâ tânzâŋgozâŋgoŋâ zeŋgâren zem sambâlem zimbap.

Zo yatik.